

大智度論卷第二十三

入三

無常如說

大地草木皆磨滅

須彌巨海亦崩竭

諸天住處皆燒盡

爾時世界何物常

十力世尊身光具

智慧明照亦無量

釋初品中十想

十想無常想苦想無我想食不淨想一切

世間不可樂想死想不淨想斷想離欲想盡

想

問曰是一切行法何以故或時名爲智或時名爲念或時名爲想答曰初習善法爲不失故但名念能轉相轉心故名爲想決定知無所疑故名爲智觀一切有爲法無常智慧相應相是名無常想一切有爲法無常者新生滅故屬因緣故不增積故復次生時無來處滅亦無去處是故名無常復次二種世間無常故說無常一者衆生無常二者世界

龍樹菩薩造

姚秦三藏法師鳩摩羅什譯

度脫一切諸衆生

名聞普遍滿十方

今日廓然悉安在

如是舍利弗目捷連須菩提等諸聖人轉輪

聖王諸國王常樂天王及諸天聖德尊貴皆亦盡大火焰明忽然滅世間轉壞如風中燈如險岸樹如漏器盛水不火空竭如是一切衆生及衆生住處皆無常故名爲無常問曰菩薩何以故行是無常想答曰以衆生著常顛倒受衆苦不得免生死行者得是無常想教化衆生言諸法皆無常汝莫著常顛倒失行道時諸佛上妙法所謂四真諦四諦中苦

諦爲初苦四行中無常行爲初以是故菩薩行無常想問曰有人見無常事至轉更堅著如國王夫人寶女從地中生爲十頭羅刹將度大海王大憂愁智臣諫言王智力具足夫人還在不久何以懷憂答言我所以憂者不慮我婦三但恐壯時易過亦如人好華好果見時欲過便大生著如是知無常乃更生諸結使云何言無常能令心厭破諸結使答曰如是見無常是知無常少分爲不具足與禽獸見無常無異以是故佛告舍利弗當具足修無常想問曰何等是具足無常想答曰觀有爲法念念生滅如風吹塵如山上水流如火炎隨滅一切有爲法無牢無強不可取不可著爲如幻化誰惑凡夫因是無常得入空門是空中一切法不可得故無常亦不可

得所以者何一念中生住滅相不可得生時不得有住滅住時不得有生滅滅時不得有生住生住滅相性相違故無是無故無常亦無問曰若無無常佛何以苦諦中說無常答曰凡夫人生邪見故謂世間是常爲滅除是常見故說無常不爲無常是實故說復次佛未出世凡夫人但用世俗道遶諸煩惱今欲拔諸煩惱根本故說是無常復次諸外道法但以形離五欲謂是解脫佛說邪相因緣故縛觀無常正相故解脫復有一種觀無常相一者有餘二者無餘如佛說一切人物滅盡唯有名在是名有餘若人物滅盡名亦滅是名無餘復有二種觀無常相一者身死盡滅二者新新生滅復次有言持戒爲重所以者何休戒因緣故次第得漏盡有言多聞爲重

所以者何依智慧故能有所得有言禪定爲重如佛所說定能得道有言以十二頭陀爲重所以者何能淨戒行故如是各各以所行爲貴更不復勤求涅槃佛言是諸功德皆是趣涅槃分若觀諸法無常是爲真涅槃道如是等種種因緣故諸法雖空而說是無常心復次無常想即是聖道別名佛種種異名說道或言四念處或言四諦或言無常想如經中說善修無常想能斷一切欲愛色愛無色愛掉慢無明盡能除三界結使以是故即名爲道是無常想或有漏或無漏正得無常是無漏初學無常是有漏摩訶衍中諸菩薩心廣大種種教化一切衆生故是無常想亦有漏亦無漏若無漏在九地若有漏在十一地緣三界五受衆四根相應除苦根凡夫聖人

得如是等種種因緣說無常功德苦想者行者作是念一切有爲法無常故苦問曰若有爲法無常故苦者諸賢聖人有爲法無漏法亦應當苦答曰諸法雖無常愛著者生苦無所著者無苦問曰有諸聖人雖無所著亦皆有苦如舍利弗風熱病苦畢陵伽婆蹉眼痛苦羅婆那跋提音聲痔病苦云何言無苦答曰有二種苦一者身苦二者心苦是諸聖人以智慧力故無復憂愁嫉妬瞋恚等心苦已受先世業因緣四大造身有老病饑渴寒熱等身苦於身苦中亦復薄少如人了了知負他債償之不以爲苦若人不憶負債債王強奪瞋惱生苦問曰苦受是心心數法身如草木離心則無所覺云何言聖人但受身苦答曰凡夫人受苦時心生愁惱爲瞋使所使心

但向五欲如佛所說凡夫人除五欲不知更有出苦法於樂受中貪欲使所使不苦不樂

受中無明使所使凡夫人受苦時內受三毒苦外受寒熱鞭杖等如人內熱盛外熱亦盛如經說凡夫人失所愛物身心俱受苦如二

箭雙射諸賢聖人無憂愁苦但有身苦更無餘苦復次五識相應苦及外因緣杖楚寒熱等苦是名身苦餘殘名心苦復次我言有爲無漏法不著故非苦聖人身是有漏有漏法則苦有何咎是末後身所受苦亦微少問曰若無常即是苦者道亦是苦云何以苦離苦答曰無常即是苦爲五受衆故說道雖作法答曰無常即是苦爲五受衆故說道雖作法故無常不名爲苦所以者何是能滅苦不生諸著與空無我等諸智和合故但是無常而非苦如諸阿羅漢得道時說偈言

我等不貪生 亦復不樂死 一心及智慧
待時至而去

佛取涅槃時阿難等諸未離欲人未善修入聖道故皆涕泣憂愁諸離欲阿那含皆驚愕諸漏盡阿羅漢其心不變但言世間眼滅疾以得道力故雖從佛得大利益知重佛無量功德而不生苦以是故知道雖無常非苦因緣故不名爲苦但五受衆是苦何以故愛著故無常敗壞故如受念處中苦義此中應廣說復次苦者有身常是苦癡覆故不覺如說騎乘疲極故 求索住立處 住立疲極故求索坐息處 坐久疲極故 求索安卧處衆極由作生 初樂後則苦 視瞬息出入屈申坐卧起 行立及去來 此事無不苦問曰是五受衆爲一切皆苦爲苦想觀故苦

若一切皆苦佛云何說有三種受苦受樂受不苦不樂受若以苦想故苦云何說苦諦爲實苦答曰五受衆一切皆苦凡夫人四顛倒因緣爲欲所逼以五欲爲樂如人塗瘡大痛息故以爲樂瘡非樂也佛說三種受爲世間故於實法中非是樂也若五受衆中實有樂何以故佛說滅五受衆名爲樂復次隨其所

嗜樂心則生樂無定也樂若實定不待心著如火實熱不待著而熱也以樂無定故名爲苦復次世間顛倒樂能得今世後世無量苦果報故名爲苦譬如大河水中著少毒不能令水異世間顛倒毒樂於一切大苦水則不現如說

從天下生地獄時 憶本天上歡樂事
宮觀綵女滿目前 園苑浴池以娛志

六三

又見獄火來燒身 似如大火焚竹林
是時雖見天上樂 徒自感結無所益
是苦想攝緣如無常想如是等種種分別苦
名爲苦想無我想者苦則是無我所以者何
五受衆中盡皆是苦苦想無有自在若無自
在是則無我若有我自在者不應令身有苦
如所說

諸有無智人 身心計是我 漸近堅著故
不知無常法 是身無作者 亦無有受者
是身爲無主 而作種種事 六情塵因緣
六種識得生 從三事和合 因緣觸法生
從觸法因緣 受念業法生 如珠日草薪
和合故火生 情塵識和合 所作事業成
相續相似有 如種有芽莖
復次我相不可得故無我一切法有相故則

知有如見烟覺熱故知有火於五塵中各各別異故知有情種種思惟籌量諸法故知有心心數法此我無相故知無我問曰有出入氣則是我相視昫壽命心苦樂愛憎精勤等是我相若無我誰有是出入息視昫壽命心

苦樂愛憎精勤等當知有我在內動發故壽命心亦是我法若無我如牛無御有我故能制心入法不爲放逸若無我者誰制御心受苦樂者是我若無我者爲如樹木則不應別苦樂愛憎精勤亦如是我雖微細不可以五情知因是相故可知爲有答曰是諸相皆是識相有識則有出入息視昫壽命等若識離身則無汝等我常遍故死人亦應有視昫出入息壽命等復次出入息等是色法隨心風力故動發此是識相非我相壽命是心不相

應行亦是識相問曰若入無心定中或睡無夢時息亦出入有壽命何以故言皆是識相答曰無心定等識雖暫無不久必還生識不捨身故有識時多無識時少是故名識相如人出行不得言其家無主苦樂憎愛精勤等是心相應共緣隨心行心有故便有心無故便無以是故是識相非我相復次若有我者我有二種若常若無常如說若我是常則無後身常不生故亦無解脫亦無忘無作以是故當知無作罪福者亦無有受者捨我及我所然後得涅槃若實有我者不應捨我心若我無常者則應隨身滅如大岸墮水亦無有罪福如是我及知者不知者作者不作者如檀波羅蜜中說不得是我相故知一切法中無我

若知一切法中無我則不應生我心若無我亦無我所心我我所離故則無有縛若無縛則是涅槃是故行者應行無我想問曰是無常苦無我爲一事爲三事若是是一事不應說三若三事佛何以故說無常即是苦苦即是無我答曰是一事所謂受有漏法觀門分別故有三種異無常行相應是無常想苦行相應是苦想無我行相應是無我想無常不令入三界苦令知三界罪過無我則捨世間復次無常生厭心苦生畏怖無我拔出令解脫無常者佛說五受衆是無常苦者佛說無常則是苦無我者佛說苦即是無我無常者佛示五受衆盡滅相苦者佛示如箭入心無我者佛示捨離相無常者示斷愛苦者示斷我習慢無我者示斷邪見無常者遮常見苦者

遮今世涅槃樂見無我者遮著處無常者世間所可著常法是苦者世間計樂處是無我者世間所可計我牢固者是是爲三想分別相無我想緣攝種種如苦想中說食獸想者觀是食從不淨因緣生如肉從精血水道生是爲膿蟲住處如酥乳酪血變所成與爛膿無異廚人汗垢種種不淨若著口中腦有爛涎二道流下與唾和合然後成味其狀如吐從腹門入地持水爛風動火煮如金熟糜淳濁下沉清者在上譬如釀酒滓濁爲屎清者爲屎穂有三孔風吹膩汁散入百脉與先血和合凝變爲肉從新肉生脂骨髓從是中生身根從新舊肉合生五情根從此五根生五識五識次第生意識分別取相籌量好醜然後生我我所心生等諸煩惱及諸罪業觀食

如是本末因緣種種不淨知內四大與外四大無異但以我見故強爲我有復次思惟此食墾植耘除收穫蹂治春磨淘汰炊煮乃成用功甚重計一鉢之飯作夫流汗集合量之食少汗多此食作之功重辛苦如是入口食之即成不淨無所一直宿昔之間變爲屎尿本是美味人之所嗜變成不淨惡不欲見行者自思如此弊食我若貪著當墮地獄敢燒鐵丸從地獄出當作畜生牛羊駱駝償其宿債或作猪狗常取糞除如是觀食則生厭想因食厭故於五欲皆厭譬如一婆羅門修淨潔法有事緣故到不淨國自思我當云何得免此不淨唯當乾食可得清淨見一老母賣白髓餅而語之言我有因緣住此百日常作此餅送來當多與價老母日日作餅送之婆

羅門貪著飽食歡喜老母作餅初時白淨後轉無色無味即問老母何緣爾耶母言癱瘡差故婆羅門問此言何謂母言我大家夫人隱處生癱以麵酥甘草拊之癱熟膿出和合酥餅日日如是以此作餅與汝是以餅好今夫人癱差我當何處更得婆羅門聞之兩拳打頭搥胃乾嘔我當云何破此淨法我爲了矣棄捨緣事馳還本國行者亦如是著是飲食歡喜樂敢見其好色細滑香美可口不觀不淨後受苦報悔將何及若能觀食本末如是生惡厭心因離食欲四欲皆捨於欲界中樂悉皆捨離斷此五欲於五下分結亦斷如是等種種因緣惡罪不復樂著是名食厭想問曰無常苦無我想與無漏智慧相應食厭等四想與有漏智慧相應次第法應在前今

何以後說答曰佛法有二種道見道修道見道中用是三想破諸邪見等得聖果猶未離欲爲離欲故三想次第說是食獸等四想得離婬欲等諸煩惱初三想示見諦道中四想爲示學修道後三想示無學道初習身念處中雖有食獸想功用少故佛不說今爲須陀洹斯陀含度欲故無我想次第食獸等四想一切世間不可樂想者若念世間色欲滋味車乘服飾廬觀園宅種種樂事則生樂想若念世間衆惡罪事則心生獸想何等惡事惡事有二種一者衆生二者土地衆生有八若之患生老病死恩愛別離怨憎同處所求不得略而言之五受衆苦衆生之罪婬欲多故不別好醜不隨父母師長教誨無有慚愧與禽獸無異瞋恚多故不別輕重瞋毒狂發乃

至不受佛語不欲聞法不畏惡道杖楚橫加不知他苦入大闇中都無所見愚癡多故所求不以道不識事緣如擊角求乳無明覆故雖蒙日照永無所見慳貪多故其舍如塚人不向之惰慢多故不敬賢聖不孝父母惰逸自壞永無所直邪見多故不信今世後世不信罪福不可共處如是等諸煩惱多故弊敗爲無所直惡業多故造無間罪或殺父母或傷害賢聖或要時榮貴譏賤忠貞殘害親戚復次世間衆生善好者少弊惡者多或時雖有善行貧賤鄙陋或雖富貴端正而所行不善或雖好布施而貧乏無財或雖富有財寶而慳惜貪著不肯布施或見人有所思默無所說便謂憍高自畜不下接物或見好下接物恩惠普潤便謂欺詐誑飾或見能語善論

便謂恃是小智以爲憍慢或見質直好人便
共欺誑調指引挽凌易或見善心柔軟便共
輕陵蹋蹴不以理遇若見持戒清淨者便謂
所行矯異輕賤不數如是等衆生弊惡無一
可樂土地惡者一切土地多衰無吉寒熱饑
渴疾病惡疫毒氣侵害老病死畏無處不有
身所去處衆苦隨之無處得免雖有好國豐
樂安隱多爲諸煩惱所惱則不名樂土一切
皆有二種苦身苦心苦無國不有如說

有國土多寒 或有國多熱 有國無救護
或有國多惡 有國常饑餓 或有國多病
有國不修福 如是無樂處

衆生土地有如是惡思惟世間無一可樂欲
界惡事如是上二界死時退時大生懊惱甚
於下界譬如極高處墮摧碎爛壞問曰無常

入三

十三

想苦想無我想一切世間不可樂想有何等
異而別說答曰有二種觀總觀別觀前爲總
觀此中別觀復有二種觀法觀衆生觀前爲
呵一切法觀此中觀衆生罪惡不同復次前
者無漏道此中有漏道前見諦道今思惟道
如是等種種差別一切地中攝緣三界法是
名一切世間不可樂想死想者如死念中說
不淨想者如身念處中說斷想離想盡想者
緣涅槃相斷諸結使故名盡想問曰若爾者一想
離想盡諸結使故名斷想離結使故名
便足何以說三答如前一法三種說無常即
是苦苦即是無我此亦如是一切世間罪惡
深重故三種呵如伐大樹不可以一下斷涅
槃微妙法昔所未得是故種種讚名爲斷想
離想盡想復次斷三毒故名爲斷離愛故名

爲離滅一切苦故更不生故名爲盡復次行者於煬法頂法忍法世間第一法正智慧觀遠諸煩惱是名離想得無漏道斷諸結使是名斷想入涅槃時滅五受衆不復相續是名盡想斷想有餘涅槃盡想無餘涅槃離想無涅槃方便門是三想有漏無漏故一切地中攝

釋初品中十一智

經十一智法智比智他心智世智苦智集智滅智道智盡智無生智如實智

論法智者欲界繫法中無漏智欲界繫因中無漏智欲界繫法滅中無漏智爲斷欲界繫法道中無漏智及法智品中無漏智比智者於色無色界中無漏智亦如是他心智者知欲界色界繫見在他心心數法及無漏心心

數法少分世智者諸有漏智慧苦智者五受衆無常苦空無我觀時得無漏智集智者有漏法因因集生緣觀時無漏智滅智者滅止妙出觀時無漏智道智者道正行達觀時無漏智盡智者我見苦已斷集已盡證已修道已如是念時無漏智慧見明覺無生智者我見苦已不復更見斷集已不復更斷盡證已不復更證修道已不復更修如是念時無漏智慧見明覺如實智者一切法總相別相如實正知無有罣礙是法智緣欲界繫法及欲界繫法因欲界繫法滅爲斷欲界繫法道比智亦如是世智緣一切法他心智緣他心有漏無漏心心數法苦智集智緣五受衆滅智緣智緣盡道智緣無漏五衆盡智無生智俱緣四諦十智者一有漏八無漏一當分別他

心智緣有漏心是有漏緣無漏心是無漏法
智攝法智及他心智苦智集智滅智道智盡
智無生智少分比智亦如是世智攝世智及
他心智少分他心智攝他心智及法智比智
世智道智盡智無生智少分苦智攝苦智及
法智比智盡智無生智少分集智滅智亦如
是道智攝道智及法智比智他心智盡智無
生智少分盡智攝盡智及法智比智他心智
苦智集智滅智道智少分無生智亦如是九
智八根相應除慧根憂根苦根世智十根相
應除慧根法智比智苦智空三昧相應法智
比智滅智盡智無生智無相三昧相應法智
比智他心智苦智集智道智盡智無生智無
作三昧相應法智比智世智苦智盡智無生
智無常想苦想無我想相應世智中四想相

應法智比智滅智盡智無生智後三想相應
有人言世智或與離想相應法智緣九智除
此智比智亦如是世智他心智盡智無生智
緣十智苦智集智緣世智及有漏他心智滅
智無生智緣道智緣九智除世智法智比智
十六相他心智四相苦集滅道各各四相盡
智無生智俱十四相除空相無我相煖法頂
法忍法中世智十六相世間第一法中世智
四想除無相言十六相轉觀相也舊初入無漏心成
就一世智第二心增苦智法智第四心增比
智第六心增集智第十心增滅智第十四心
增道智若離欲者增他心智無學道增盡智
得不壞解脫增無生智初無漏心中不修智
第二心中現在未來修二智第四心中現在
修二智未來修三智第六心中現在未來修

二智第八心中現在修二智未來修三智第十心中現在未來修三智第十二心中現在修二智未來修三智第十四心中現在未來修二智第十六心中現在修二智未來修六智若離欲修七智須陀洹欲離欲界結使十

七心中修七智除他心智盡智無生智第九解脫心中修八智除盡智無生智信解人轉作見得雙道中修六智除他心智世智盡智無生智離七地欲時無礙道中修七智除他心智盡智無生智解脫道中修八智除盡智無生智離有頂欲時無礙道中修六智除他心智世智盡智無生智八解脫道中修七智除世智盡智無生智無學初心第九解脫不時解脫人修十智及一切有漏無漏善根若時解脫人修九智及一切有漏無漏善根

是等種種如阿毗曇門廣分別如實智分別相此般若波羅蜜後品廣說復次有人言法智者知欲界五眾無常苦空無我知諸法因緣和合生所謂無明因緣諸行乃至生因緣老死如佛爲須尸摩梵志說先用法智分別

八三

十六之一

諸法後用涅槃智比智者知現在五受眾無常若空無我過去未來及色無色界中五受眾無常若空無我亦如是譬如見現在火熱能燒以此比知過去未來及餘國火亦如是他心智者知他眾生心心數法問曰若知他心心數法何以故但名知他心答曰心是主故但名知他心若說心當知己說心數法世智者名爲假智聖人於實法中知凡夫人但假名中知以是故名假智如棟梁椽壁名爲屋但知是事不知實義是名世智苦智者用

八三

十六之二

苦慧呵五受眾問曰五受眾亦無常亦苦亦空亦無我何以故但說苦智不說無常空無我智答曰爲苦諦故說苦智集諦故說集智滅諦故說滅智道諦故說道智問曰五受眾有種種惡何以但說苦諦不說無常諦空無

我諦答曰若說無常空無我諦亦不壞法相以眾生多著樂畏苦故佛呵世間一切皆是苦欲令捨離故無常空無我中眾生不大畏故不說復次佛法中五受眾有異名名爲苦以是故但說苦是苦智或有漏或無漏若在

煖法頂法忍法世間第一法是有漏若入見諦道是無漏何以故從煖法至世間第一法中四種觀苦故集智滅智道智亦如是復次苦智名知苦相實不生集智名知一切法離無有和合滅智名知諸法常寂滅如涅槃道

智名知一切法常清淨無正無邪盡智名知一切法無所有無生智名知一切生法不實不定故不生如實智者十種智所不能知以如實智故能知十智各各相各緣各各別異各各有觀法是如實智中無相無緣各各別

滅諸觀法亦不有觀十智中有法眼慧眼如實智中唯有佛眼十智阿羅漢辟支佛菩薩共有如實智唯獨佛有以者何獨佛有不詭法以是故知知實智獨佛有復次是十智入如實智中失本名字唯有一實智譬如十

方諸流水皆入大海捨本名字但入大海知如是等種種分別十一智義此中略說

三三昧有覺有觀三昧無覺有觀三昧無

覺無觀三昧

一切禪定攝心皆名爲三摩提此言正心

行處是心從無始世界來常曲不端得是正心行處心則端直譬如蛇行常曲入竹筒中則直是三昧三種欲界未到地初禪與覺觀相應故名有覺有觀禪中間但觀相應故名無覺有觀從第二禪乃至有頂地非覺觀相

應故名無覺無觀問曰三昧相應心數法乃至二十何以但說覺觀答曰是覺觀撓亂三昧以是故說是二事雖善而是三昧賊難可捨離有人言因有覺觀者無三昧以是故佛說有覺有觀三昧但不牢固覺觀力小微是

八三

十八之一

時可得有三昧是覺觀能生三昧亦能壞三昧譬如風能生雨亦能壞雨三種善覺觀能生初禪得初禪時發大歡喜覺觀故心散還失以是故但說覺觀問曰覺觀有何差別答曰麤心相名覺細心相名觀初緣中心發相

名覺後分別籌量好醜名觀有三種麤覺欲覺瞋覺惱覺有三種善覺出要覺無瞋覺無惱覺有三種細覺親里覺國土覺不死覺六種覺妨三昧三種善覺能開三昧門若覺觀過多還失三昧如風能使傳風過則壞船如

八三

十八之二

是種種分別覺觀問曰經說三種法有覺有觀法無覺有觀法無覺無觀法有覺有觀地無覺有觀地無覺無觀地今何以但說三昧答曰妙而可用者取有覺有觀法者欲界未到地初禪中覺觀相應法若善若不善

若無記無覺有觀法者禪中間觀相應法若善若無記無覺無觀法者離覺觀法一切色心不相應行及無爲法有覺有觀地者欲界未道地梵世無覺有觀地者禪中間善修是地作大梵王無覺無觀地者一切光音一切

遍淨一切廣果一切無色地於中上妙者是三昧何等是三昧從空等三三昧乃至金剛及阿羅漢辟支佛諸三昧觀十方佛三昧乃至首楞嚴三昧從斷一切疑三昧乃至三昧王等諸佛三昧如是等種種分別略說三昧義

入三十九

經三根未知欲知根知已根

論未可知根者無漏九根和合信行法行人於見諦道中名未知欲知根所謂信等五根喜樂捨根意根信解見得人思惟道中是九根轉名知根無覺道中是九根名知已根問曰何以故於二十二根中但取是三根答曰利解了了自在相是名爲根餘十九根根相不具足故不取是三根利能直入至涅槃諸有爲法中主故得自在能勝諸根復次十

根但有漏自得無所利益故九根不定或有漏或無漏故不說菩薩應具足問曰十想亦有漏無漏何以故說應具足答曰十想皆是助道求涅槃法信等五根雖是善法不盡求涅槃如阿毗曇中說誰成就信等根不斷善根者復次若五根清淨變爲無漏三根中已攝是三根中必有意根三受中必有一受以是故但說三根復次二十二根有善有不善有無記雜是故不說應具足是三根受衆行衆識衆攝未知欲知根在六地知根知已根在九地三根緣四諦六想相應未知欲知根三根因知根二根因知已根但知已根因未知欲知根次第生二根知根次第或生有漏根或生知根或生知已根知已根或生有漏根或生知已根如是等以阿毗曇門廣分別

入二

二十一

說復次未知欲知根名諸法實相未知欲知故生信等五根是五根力故能得諸法實相如人初入胎中得二根身根命根爾時如段肉未具諸根未能有所別知五根成就能知五塵菩薩亦如是初發心欲作佛未具足是

五根雖有願欲知諸法實相不能得知菩薩生是信等五根則能知諸法實相如眼四大及四大造色和合名爲眼先雖有四大四大造色未清淨故不名眼根不斷善根人雖有信未清淨故不名爲根若菩薩得是信等五根是時能信諸法相不生不滅不垢不淨非有非無非取非捨常寂滅真淨如虛空不可示不可說一切語言道過出一切心心數法所行如涅槃是則佛法菩薩以信根力故能受精進根力故慇行不退不轉念根力故不

今不善法入攝諸善法定根力故心散五欲中能攝實相中慧根力故於佛智慧中少多得義味不可壞五根所依意根必與受俱若喜若樂若捨依是根入菩薩位乃至未得無生法忍果是名未知欲知根此中知諸法實相了了故名知從是得無生法忍果住阿鞞跋致地得受記乃至滿十地坐道場得金剛三昧於其中間名爲知根斷一切煩惱習得阿耨多羅三藐三菩提一切可知法智慧遍滿故名爲知已根

大智度論卷第二十三
音釋

王

叵普大切憚五各切輸輸閭切惻惻氏切
不可也 慚驚悚也 眇目動也 淚濺也
醸女亮切獲胡郭切蹂人又切淘汰淘徒切
作酒也 剖獲也 蹤踐也 淘濺也
蓋沐徒切聲古候切取七六切撓奴巧切
牛羊乳也 蹤追感也 撓擾也